

DEKLARASAUN BA IMPRENSA

SR.PREZIDENTE, ohin, nu'udar Primeiru-Ministru Timor-Leste nian, halo ha'u nia vizita ofisiál dahuluk ba Indonézia tuir Konvite V. Esia. Pak Joko Widodo "Jokowi", Prezidente Repúlika Indonézia nian. Ba ha'u nu'udar onra ida hodi hasoru malu ho V. Esia. no ho ita-nia gabinete. Ha'u hakarak tebes hato'o ha'u nia obrigadu barak tanba simu ha'u no ha'u nia delegasaun ho di'ak.

Ha'u ko'alia asuntu sira ne'ebé produtivu no konstrutivu tebes ho Sr. Prezidente Jokowi. Ami fahe ba malu perspetiva sira ne'ebé kle'an kona-ba relasaun bilaterál entre Timor-Leste no Indonézia no ami ko'alia mós kona-ba kestaun oioin rejionál no internasionál nian sira ne'ebé mak iha interese komún.

Iha nível bilaterál, ha'u hahii ba dezvoltimentu kooperasaun ne'ebé metin iha nível oioin, inklui polítiku, diplomátiku, seguransa no defeza, ekonómiku, edukativu no sosiokulturál. Kooperasaun ne'e hametin ita-nia relasaun sira la'ós de'it entre ita-nia governu no empreza sira, maibé mós ho ita-nia povu sira. Liuhusi vizita regulár ne'ebé hala'o ona entre nível aas nian sira kontribui hodi hametin ita-nia empenhu polítiku hodi hametin relasaun bilaterál sira. Relasaun emprezariál kontinua iha nia tendénsia pozitivu liuliu kona-ba komérsiu no kooperasaun ekonómiku, ne'ebé mak ita-nia kámara sira komérsiu nian halo kontaktu hela no iha empreza Indonézia nian barak tebes (hamutuk estatál nian 14 no empreza privadu besik 400) ne'ebé maka hala'o iha Timor-Leste. Nune'e mós iha estudante timoroan sira besik 500 maka halo estudu iha Indonézia no sidadaun Indonéziu 7000 ne'ebé daudaun ne'e hela iha Timor-Leste ho objetivu sira ne'ebé lahanesan.

Kooperasaun bilaterál aumenta daudaun iha área hothotu, tanba liuhosi memorandu entendimentu liu 50 ne'ebé asina ona entre país rua ne'e. Ha'u agradese ba Indonézia tanba ninia empenhu nafatin atu hadi'a ita-nia parseria iha nível kapasitasaun no assisténsia téknika, kona-ba área sira hanesan agrikultura, peska, floresta, komérsiu no infraestrutura, tuir loos ho agenda dezvoltimentu nasionál no prioridade sira Timor-Leste nian. Ohin ita bele haree-tan asinatura ba akordu rua (2) iha área agrikultura no floresta nian.

Kona-ba negosiasaun fronteira nian, ha'u kongratula ho progresu hirak ne'ebé hala'o ona to'o oras ne'e. Pontu sia (9) ne'e hotu kona-ba pasajen fronteira nian nakloke hela no uza pase pasajen fronteira nian nune'e, bele fasilita ema sira husi nasaun rua nian atubele tama-sai ne'ebé hela iha área rai-ketan. Ha'u hakarak atu halo lalais lansamentu ba merkadu regulár fronteira nian ida, iha tempu badak, karik iha tinan 2016. Ha'u mós hakarak tenik fali kompromisu Governu Timor-Leste nian, ne'ebé ha'u iha onra atu lidera, hodi haka'as an atubele rezolve lalais segmentu fronteira terrestre nian rua (2) ne'ebé maka seidauk rezolve.

Ho ida ne'e, ha'u hakarak informa mós katak ha'u nia governu pruntu ona atu hahú hala'o diskusaun sira kona-ba demarkasaun fronteira marítimu ho Indonézia, tuir hakerek ona iha UNCLOS 1982, ne'ebé maka hetan ona ratifikasaun hosi ita-nia país rua ne'e. Kona-ba ida ne'e, ha'u fó ona instrusaun ba ha'u nia ekipa tékniku atu hahú prepara hodi halo konsulta iha tinan ida ne'e nia laran, karik molok ka durante hala'o sorumutuk oin mai Komité Fronteira Konjuntu nian (CFC-sigla iha lian portugés), ne'ebé la kleur tan sei hala'o iha Dili.

Ha'u hakarak tenik fali kompromisu ha'u nia governu nian no atu hatete katak, importante tebes atu mantein koordenasaun no halo konsulta ne'ebé kle'an liu entre ita-nia país rua ne'e liuhusi mekanizmu bilaterál ne'ebé iha tiha ona, hanesan Komité Ministériál Konjuntu (CMC-sigla iha lian portugés), Sorumutuk Ajente Superiór sira (RAS-sigla iha lian portugés) CMS nian kona-ba Kooperasaun Bilaterál, Sorumutuk Ajente Superiór sira Komisaun Verdade no Amizade (RAS-CVA-sigla sira iha lian portugés) no Komité Fronteirisu Konjuntu (CFC-sigla iha lian portugés).

Ko'alia kona-ba kestaun rejionál sira, ha'u hakarak hato'o ami-nia apresiasaun ba Indonézia nia apoiu ba Timor-Leste ninia adezaun ba ASEAN. Ha'o mós hakarak liuliu hato'o importánsia ne'ebé maka ha'u nia governu fó ba ASEAN.

Ita mós halo parte kona-ba mekanizmu rejionál sira seluk, maka hanesan Diálogu Sudoeste Pasífiku (DSP), Inisiativa Triángulu Korál, Grupu Vanguarda Melanéziu (GVM) no kooperasaun bilaterál entre Timor-Leste, NTT no Territóriu Norte Austrália, ne'ebé sei iha hela faze inisiál.

Ha'u la bele haluha mós atu hahii lider indonéziu sira nian liuhosi susesu ne'ebé hetan hodi lidera Simeira Ázia-Áfrika nian, nune'e mós fó parabéns ba povu Indonézia ba aniversáriu da-70 sira-nia Loron Ukun Rasik-an nian.

Ha'u hakarak remata hodi temi fali ba konvite ita-nia Prezidente Repúblika nian no hodi hatete katak, laiha buat ida di'ak liu ne'ebé bele haksolok ha'u duké bele simu V. Esia. Prezidente Joko Widodo iha Timor-Leste iha loron ne'ebé maka V.Esia. hakarak, OBRIGADU.